



SLUŽBENE NOVINE

KANTONA SARAJEVO

Godina XVII – Broj 54

Ponedjeljak, 31. decembra 2012. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu čl. 11. i 18. tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01 i 28/04), a u vezi sa članom III. 4. Ustava Federacije Bosne i Hercegovine, Skupština Kantona Sarajevo na 22. sjednici, održanoj 27.12.2012. godine, donijela je

ZAKON

O JAVNIM SKIJALIŠTIMA

POGLAVLJE I. OSNOVNE ODREDBE

Član 1.

(Sadržaj Zakona)

Ovim Zakonom propisuju se: uvjeti za uređenje, održavanje i opremanje javnog skijališta, pružanje usluga na skijalištu, obilježavanje i postavljanje signalizacija na skijalištu, korištenje sredstava prijevoza na skijalištu, bezbjednost i red na skijalištu, podučavanje na skijalištu, kao i druga pitanja koja su od značaja za korištenje skijališta.

Član 2.

(Primjena propisa)

Poslovi iz člana 1. ovog Zakona obavljaju se u skladu sa ovim Zakonom i drugim zakonima kojima se uređuju pitanja koja se odnose na skijališta i vertikalni transport.

Član 3.

(Značenje izraza upotrijebljenih u Zakonu)

Pojedini izrazi upotrijebljeni u ovom Zakonu, ako drugačije nije određeno, imaju slijedeće značenje:

- 1) usluge na skijalištu su organizovanje skijanja i specijalizovanih zimskih sportskih aktivnosti, podučavanje skijanju, iznajmljivanje i servisiranje opreme za skijanje, prihvatanje i usluživanje skijaša i drugih korisnika skijališta;
- 2) skijanje je zimska sportska aktivnost rekreativnog ili takmičarskog karaktera koja se sastoji iz alpskog skijanja, nordijskog skijanja, biatlon, snowboarda, ski skokova, freestyle ili skijanja na travi;
- 3) skijaš je fizičko lice koje se u cilju rekreacije bavi skijanjem na ski stazi, ili se nalazi na ski stazi radi skijanja;
- 4) ski staza je uređena i obilježena površina skijališta, namijenjena za skijanje i podučavanje skijanju;
- 5) ski poligon je uređena i obilježena površina skijališta namijenjena specijalizovanim zimskim sportskim aktivnostima;

- 6) ski ruta je obilježena površina za vožnju skijama koju skijaški centar ne obezbjeđuje od neuobičajenih i neočekivanih opasnosti skijanja;
- 7) ski put je put napravljen ili otvoren za vožnju skijama koji predstavlja dio ski staze, međusobno povezuje ski staze ili povezuje ski staze sa drugim objektima na skijalištu, ili služi za izvlačenje (evakuaciju) povrijeđenih skijaša;
- 8) zaštitna zona ski staze je prostor širine 1-5 metara koji se prostire uz ski stazu;
- 9) ski područje je prostor na kojem se nalazi skijalište čije su granice udaljene 2 kilometra od krajnjih granica uređenih i obilježenih ski staza;
- 10) specijalizovane zimske sportske aktivnosti su sankanje, ski bob, skokovi, motosankanje, spuštavanje gumama, skijanje u dubokom snijegu, paraglajding, skeleton i druge slične zimske sportske aktivnosti;
- 11) takmičar je fizičko lice aktivno uključeno u skijaško takmičenje ili trening za takmičenje na stazi ili dijelu staze određene od strane skijaškog centra;
- 12) uobičajena opasnost i rizik skijanja je opasnost odnosno rizik koji prosječan skijaš, pri potrebnoj pažnji, mora ili može predvidjeti da će postojati na vrsti staze koju koristi, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
- 13) alpski rizik je situacija koja sa sobom nosi veliki rizik za lica na skijalištu (opasnost lavine, odrona kamenja, pada u provaliju, zatrpavanja snijegom koji visi iznad litice, ekstremna zaleđenost staze ili ključnog dijela staze i sl.);
- 14) neuobičajena i neočekivana opasnost skijanja je opasnost odnosno rizik koju prosječan skijaš, pri potrebnoj pažnji, nije mogao predvidjeti da će postojati na vrsti staze koju koristi, pri datim vremenskim uvjetima, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
- 15) smanjena vidljivost postoji ako zbog nepovoljnih atmosferskih ili drugih prilika skijaš ne može jasno da uoči druga lica koja se nalaze na skijalištu na udaljenosti od najmanje 20 metara;
- 16) skijaška nesreća je nezgoda na stazi u kojoj je učestvovao najmanje jedan skijaš u pokretu, i u kojoj je jedno ili više lica povrijeđeno ili poginulo ili je izazvana materijalna šteta;
- 17) žičara je sredstvo prijevoza sa posebnim saobraćajno - tehničkim osobinama (žičara i uspinjača) namijenjeno za prijevoz skijaša na stazu ili sa staze;
- 18) ski lift je sredstvo prijevoza za vuču skijaša po snijegu, uzbrdo;
- 19) polazna stanica žičare ili lifta je mjesto sa koga korisnici žičare ili lifta otpočinju vožnju;

- 20) izlazna stanica žičare ili lifta je prostor koji obuhvata plato za iskrcavanje sa okretnom stanicom ili povratnom užetnjačom;
- 21) škola skijanja je pravno lice ili preduzetnik registrovan za obavljanje poslova podučavanja skijanja i specijalizovanih zimskih sportskih aktivnosti;
- 22) instruktor skijanja je fizičko lice koje se bavi poslovima podučavanja skijanja i specijalizovanih zimskih sportskih aktivnosti i ima u skladu sa zakonom kojim je uređena oblast sporta, odgovarajuće zvanje instruktora, učitelja ili trenera skijanja i licencu nadležnog sportskog saveza;
- 23) učenik skijanja je fizičko lice koje učestvuje kao polaznik škole skijanja za podučavanje skijanja i specijalizovanih zimskih sportskih aktivnosti;
- 24) nadležni sportski savez je udruženje ili savez organizacija za obavljanje zimskih sportskih aktivnosti i djelatnosti koji je registrovan u skladu sa zakonom kojim se uređuje sport i preko koga se ostvaruje opšti interes u oblasti sporta;
- 25) motorne sanke su motorno vozilo sa dvotaktnim ili četvorotaktnim motorom sa pogonom na dizel ili benzin, sa jednim ili više sjedišta i skijama sprijeđa za upravljanje, dizajnirana za zimsku vožnju na snijegu ili ledu, koja za kretanje ne zahtijevaju cestu ili posebno uređenu stazu;
- 26) vozač motornih sanki je lice osposobljeno za upravljanje motornim sankama na specijalizovanim stazama i površinama koje su posebno obilježene i pripremljene;
- 27) Spasilački stacionar je istureno odjeljenje bolničkog stacionara u smislu Zakona o zdravstvenoj zaštiti.

Član 4.

(Javno skijalište)

- (1) Javno skijalište je uređena javna površina, pogodna za organizovanje skijanja i specijalizovanih zimskih sportskih aktivnosti sa objektima, uređajima i opremom čije je korišćenje odnosno izgradnja od opšteg interesa.
- (2) Javno skijalište se može koristiti za obavljanje djelatnosti i pružanje usluga na skijalištu, pod uvjetima jednakim za sve korisnike u skladu sa ovim Zakonom.
- (3) Alpsko, nordijsko i akrobatsko skijanje, biatlon, snowboard, free style, kao i podučavanje skijanju se može obavljati samo na uređenim ski stazama.
- (4) Ski skokovi, kao i podučavanje ski skokovima se može obavljati samo na obezbijedenim skakaonicama predviđenim za ski skokove.
- (5) Skijanje na travi, kao i podučavanje skijanju se može obavljati samo na predviđenim i uređenim stazama za skijanje na travi.
- (6) Specijalizovane zimske sportske aktivnosti i početničke škole skijanja mogu se obavljati na ski poligonima koji moraju biti jasno obilježeni i vidljivo odvojeni od ski staza.
- (7) Javnim skijalištima, kao i drugim posebno uređenim površinama, namijenjenim za skijanje i za specijalizovane zimske sportske aktivnosti, upravlja skijaški centar u skladu sa ovim Zakonom.
- (8) Odredbe ovog Zakona koje se odnose na javno skijalište shodno se primjenjuju i na druge posebno uređene površine, namijenjene za skijanje i specijalizovane zimske sportske aktivnosti, ako ovim Zakonom nije drugačije određeno.

Član 5.

(Djelatnost od opšteg interesa)

- (1) Uređenje, opremanje, održavanje, korišćenje i upravljanje javnim skijalištem (u daljem tekstu: skijalište), kao i upravljanje prostorima pogodnim za uređenje skijališta, u smislu ovog Zakona, smatraju se djelatnostima od opšteg interesa.
- (2) Za obavljanje djelatnosti iz stava (1) ovog člana osniva se skijaški centar kao javno preduzeće, u skladu sa zakonom kojim se uređuje pravni položaj javnih preduzeća i uvjeti i način obavljanja djelatnosti od opšteg interesa.
- (3) Za uređenje, opremanje, održavanje, korišćenje i upravljanje drugim posebno uređenim površinama, namijenjenim za skijanje i specijalizovane zimske sportske aktivnosti, osniva se

skijaški centar kao privredno društvo, odnosno kao drugi oblik preduzeća ili preduzetnik.

- (4) Skijaški centar iz st. (2) i (3) ovog člana je obavezan da obezbijedi korištenje skijališta koja se nalaze u zaštićenom prirodnom području u skladu sa zakonodavstvom koje vrijedi za konkretno zaštićeno prirodno područje.
- (5) U provođenju aktivnosti iz stava (4) ovog člana, Skijaški centar iz st. (2) i (3) ovog člana je obavezan na saradnju sa Kantonalnom javnom ustanovom za zaštićena prirodna područja u cilju njihove zaštite.
- (6) Skijaški centar iz st. (2) i (3) ovog člana je obavezan da obezbijedi da se uplane ski staze i drugi sportski objekti koje koristi u katastar nekretnina nadležne općine.
- (7) Skijaški centar iz st. (2) i (3) ovog člana je obavezan da obezbijedi da se uknjiže ski staze i drugi sportski objekti koje koristi u zemljišnu knjigu kod nadležnog općinskog suda.

Član 6.

(Odgovornost za štetu)

- (1) Na odgovornost za štetu prouzrokovanu na skijalištu primjenjuju se opšta pravila o odgovornosti za štetu.
- (2) Pravom na naknadu štete prouzrokovane na skijalištu ne obuhvataju se one štete koje su rezultat uobičajene opasnosti i rizika skijanja.

POGLAVLJE II. UREĐENJE, OBILJEŽAVANJE, KORIŠĆENJE I BEZBJEDNOST NA SKIJALIŠTU

ODJELJAK A. Uređenje

Član 7.

(Skijalište)

Skijalište se sastoji iz jedne ili više ski staza, ski poligona, ski puteva, ski ruta, ski liftova, žičara, infrastrukturne mreže i objekata, kao i infrastrukture za zbrinjavanje otpada, servisnih objekata skijališta, snježne i servisne mehanizacije, servisnih puteva, sopstvenih energetskih objekata, pristupnih puteva i parkinga na ulazima u skijalište, objekata za obavljanje djelatnosti.

Član 8.

(Uređivanje skijališta i ski staza)

- (1) Skijalište i pristupni putevi do skijališta ne mogu se graditi na površinama koje su pod uobičajenim snježnim padavinama izložene lavinama.
- (2) Skijalište i ski staze se uređuju u zavisnosti od toga za koju su rekreativnu ili takmičarsku zimsku sportsku aktivnost namijenjene, tako da su skijaši zaštićeni od neuobičajenih i neočekivanih opasnosti skijanja i alpskih rizika.
- (3) Skijalište mora biti izgrađeno u skladu sa važećim propisima iz oblasti zaštite okoliša tako da zadovolji uvjete u pogledu očuvanja i zaštite životne sredine, kao i da ispunjava odgovarajuće sanitarno-higijenske uvjete što uključuje obavezno posjedovanje infrastrukture za zbrinjavanje otpada.
- 4) Uređivanje skijališta i stvaranje uvjeta za njegovo sigurno korištenje smatra se osobito:
 - a) prethodno tehničko uređivanje i tekuće održavanje skijališta,
 - b) zaštita od lavina,
 - c) postavljanje zaštita ispred zgrada, javnih puteva, provalija, šuma, stupova, stijena, vododerina, potoka i drugih opasnih mjesta,
 - d) postavljanje oznaka zabrana, upozorenja i obavijesti,
 - e) osiguranje službe spašavanja i pružanja prve pomoći,
 - f) osiguranje sistema veza na skijalištu i veza sa zdravstvenom ustanovom i službom unutrašnjih poslova,
 - g) osiguranje redarske službe na skijalištu.

Član 9.

(Ski staze)

- (1) Ski staze na skijalištu moraju biti široke, pregledne, sa nagibom i visinskom razlikom i pripremljene tako da na njima

nema rupa, vrtača, kamenih kompleksa ili drugih opasnih mjesta.

- (2) Opasna mjesta na ski stazi (krivine, ukrštanje staza, veće strmine, objekti, mjesta gdje se izvode radovi) moraju biti posebno obilježena i osigurana ogradama za usmjerenje, zaštitnim ogradama ili mrežama, oblogama protiv udaraca i sličnim sredstvima zaštite.

Član 10.

(Zabrana postavljanja reklama i natpisa)

Na ski stazi i zaštitnoj zoni ski staze nije dozvoljeno postavljanje reklama i natpisa koji nisu vezani za korišćenje staze, osim reklamnih poruka na ogradi skijališta - ski staze.

Član 11.

(Izgradnja žičare)

Izgradnja žičare na prostorima koji su pogodni za skijanje predstavlja radnju uređenja skijališta, u skladu sa ovim Zakonom.

Član 12.

(Količina snijega)

- (1) Ski staza može da se koristi za skijanje samo ako na njoj postoji količina snijega koja je dovoljna za nesmetano skijanje bez povećanog rizika.
- (2) Odluku o tome da li na ski stazi ima potrebna količina snijega za prirodnu ili vještačku podlogu za nesmetano skijanje bez povećanog rizika, donosi šef staza iz člana 50. ovog Zakona.

Član 13.

(Zasnježavanje vještačkim snijegom)

- (1) U slučaju nedostatka prirodnog snijega Ski centar može vršiti zasnježavanje ski staza vještačkim snijegom.
- (2) Proizvodnja vještačkog snijega u zaštićenim prirodnim područjima i područjima značajnim za osiguranje vode za piće, gdje su posebnim zakonima predviđene strožije mjere zaštite okoliša, mora se vršiti isključivo od vode i vazduha, bez dodavanja bilo kakvih aditiva.

Član 14.

(Liftovi, žičare i staze)

Skijaški centar obavezan je odrediti brojeve liftova, žičara i staza. Liftovi, žičare i staze mogu imati i nazive.

Član 15.

(Prostor za polijetanje i slijetanje)

- (1) Delta-plan i druga sredstva sportskog vazduhoplovstva ne smiju polijetati i slijetati na ski stazu.
- (2) Ukoliko je u okviru skijališta uređen prostor za polijetanje i slijetanje, on mora biti jasno razdvojen od ski staze, odgovarajuće signaliziran i obezbijeđen od lavina.

Član 16.

(Osvjetljenje na skijalištu)

Skijalište, odnosno njegove staze namijenjene skijaškim aktivnostima noću moraju imati odgovarajuće osvjetljenje, uključujući i neposredne prilaze, kao i trasu vertikalnog transporta koja se koristi, tako da je osigurana bezbjednost svih lica koja se nalaze na stazi i njenim prilazima.

Član 17.

(Sletišta za helikoptera za pružanje hitne pomoći)

U okviru skijališta ili njegovoj neposrednoj blizini obavezno je uređenje odgovarajućeg mjesta za slijetanje helikoptera u cilju obezbjeđenja pružanja hitne pomoći.

Član 18.

(Ski staze namijenjene za takmičenja)

- (1) Ski staza koja je pored rekreativnog namijenjena i takmičarskom skijanju ili samo takmičarskom skijanju uređuje se tako da ispunjava posebne uvjete (visinska razlika, dužina i širina staze, debljina snijega, zaštitne mjere, prepariranja staze, markiranje i dr.) utvrđene odgovarajućim Međunarodnim

takmičarskim pravilima koje je propisala Međunarodna skijaška federacija (FIS) i nacionalnim sportskim pravilima.

- (2) Takmičarska ski staza mora za vrijeme korišćenja u svrhe rekreativnog skijanja da bude tako uređena da ispunjava opšte uvjete utvrđene ovim Zakonom u pogledu markiranja, signalizacije i preuzimanja mjera koje osiguravaju bezbjednost skijaša.
- (3) Skijalište koje je u skladu sa ovim Zakonom utvrđeno kao sportski objekat od javnog interesa ima najmanje jednu ski stazu uređenu i homologizovanu, u skladu sa sportskim pravilima, za nacionalna i međunarodna skijaška takmičenja.

ODJELJAK B. Obilježavanje

Član 19.

(Klasifikovanje i obilježavanje ski staza)

- (1) Ski staze se klasifikuju i obilježavaju (markiraju) prema stepenu težine, u zavisnosti od svojstava područja, odnosno površina preko kojih se pruža staza.
- (2) Ski staze se obilježavaju oznakama određenih boja. Oznaka je okruglog oblika prečnika 40 - 50 cm. Ski staze se prema težini klasifikuju i obilježavaju kao:
 - a) laka staza - plava boja;
 - b) srednje teška staza - crvena boja;
 - c) teška staza - crna boja;
- (3) Ski rute i staze za motorne sanke se markiraju žutom bojom nezavisno od stepena težine. Oznake moraju biti tako postavljene da su više od snijega.
- (4) Ne moraju se obilježavati lako pristupačne i blago nagnute površine koje služe isključivo podučavanju osnovnih oblika vožnje skijama, pod uvjetom da nemaju rizičnih mjesta i da su jasno vidljive njihove granice, odnosno ivice.

Član 20.

(Granice skijališta)

- (1) Granice skijališta moraju biti označene na ključnim mjestima oznakama koje su vidljive u uvjetima normalne vidljivosti.
- (2) Označavanje granica skijališta vrši se štapovima narandžaste boje i tablom na kojoj se nalazi odgovarajući tekst.

Član 21.

(Panoramske table i table za orijentaciju)

Na skijalištu moraju da budu postavljene odgovarajuće panoramske table i table za orijentaciju.

ODJELJAK C. Održavanje

Član 22.

(Obaveze Skijaškog centra na održavanju staza)

- (1) Skijaški centar obavezan je da za sve vrijeme trajanja ski sezone, odnosno za sve vrijeme upotrebe skijališta, kontroliše opšte stanje skijališta i da ga održava u ispravnom stanju, odnosno u stanju koje omogućava namjensko i bezbjedno korišćenje staze.
- (2) U vrijeme kada skijalište nije u upotrebi, skijaški centar je dužan da se stara o čuvanju skijališta i redovnom održavanju staza i opreme na skijalištu.
- (3) Održavanje ski staza obuhvata ljetnjo i zimsko održavanje.
- (4) Održavanje ski ruta, takmičarskih staza i specijalizovanih staza vrši se u zavisnosti od prirode staze, vremenskih uvjeta i zimske sportske aktivnosti koja se na njoj odvija.
- (5) Skijaški centar je obavezan da održava žičaru i zaštitno područje oko žičare u stanju koje omogućava bezbjedno korišćenje žičare, u skladu sa ovim Zakonom i propisima donijetim na osnovu ovog Zakona.

Član 23.

(Minimalni tehnički uvjeti)

Minimalne tehničke uvjete za uređenje, obilježavanje i održavanje skijališta propisat će ministar Ministarstva kulture i sporta Kantona Sarajevo.

ODJELJAK D. Signalizacija

Član 24.

(Odgovarajuća signalizacija)

Na skijalištu mora biti postavljena odgovarajuća signalizacija, tako da se ne može lako ukloniti i da odgovara stvarnim okolnostima na stazi.

Član 25.

(Znakovi obavještenja, upozorenja, obaveza i zabrana)

- (1) Signalizacija se vrši postavljanjem odgovarajućih znakova obavještenja, upozorenja, obaveza, zabrana, dopunskih tabli i svjetlosnih signala.
- (2) Znaci na skijalištu postavljaju se i održavaju tako da su vidljivi, da ne ometaju korišćenje ski staza i da skijaši mogu na vrijeme da ih lako uoče i da blagovremeno postupe u skladu sa njihovim značenjem.
- (3) Postavljeni znakovi moraju da se uklone, dopune ili zamijene, ako njihovo značenje ne odgovara izmijenjenim uvjetima na skijalištu ili zahtjevima bezbjednosti.
- (4) Na skijalištu ne smiju da se postavljaju table, svjetla, stubovi ili drugi slični predmeti kojima se zaklanja ili umanjuje vidljivost postavljenih znakova ili koji svojim oblikom, bojom, izgledom ili mjestom postavljanja podražavaju ili liče na neki znak na skijalištu, ili zaslijepljuju skijaše ili odvrćaju njihovu pažnju u mjeri koja može biti opasna za bezbjednost skijanja.
- (5) Vrstu znakova, njihovu sadržinu, mjesto postavljanja i druga pitanja od značaja za ostvarenje funkcije znakova na skijalištima uredit će se posebnim pravilnikom koji donosi ministar Ministarstva saobraćaja Kantona Sarajevo.

ODJELJAK E. Neobezbjedene staze

Član 26.

(Neobezbjedene i divlje ski staze)

- (1) Na divljim ski stazama, neobezbjedenim stazama i van skijaških staza, skijaši se skijaju na sopstveni rizik.
- (2) U cilju sprječavanja korišćenja divljih ski staza, skijaški centar je obavezan da u okviru skijališta postavi odgovarajuća upozorenja i znakove opasnosti od sniježnih lavina, sniježnih streha, okomitih litica i rasjeda.

ODJELJAK F. Sredstva prijevoza na skijalištu

Član 27.

(Upotreba službenih motornih vozila, motornih sanki i mehanizacije)

- (1) Na ski stazi, osim službenih motornih vozila, ne može biti prisutno ni jedno drugo motorno vozilo, osim ako ovim Zakonom nije drugačije određeno.
- (2) Motorne sanke, osim službenih motornih sanki u službi ski centra mogu da se koriste samo na specijalizovanim stazama i površinama koje su posebno pripremljene i obilježene za korišćenje motornih sanki van područja koje je obilježeno kao ski staza, javni put, pješačka staza i pristupni put.
- (3) Postupak i način osposobljavanja vozača motornih sanki za bezbjednu vožnju na skijalištu propisaoće Ministarstvo obrazovanja, nauke i mladih Kantona Sarajevo u saradnji sa ovlaštenom auto školom.
- (4) Registrovanje i korišćenje motornih sanki na skijalištu, obaveze postupanja u slučaju nesreće, mjere bezbjednosti prilikom korišćenja motornih sanki i druga pitanja korišćenja motornih sanki na skijalištu, posebnim pravilnikom propisaoće Ministarstvo unutrašnjih poslova Kantona Sarajevo u saradnji sa Ministarstvom saobraćaja Kantona Sarajevo.
- (5) Vozač motornih sanki ne smije vozilom da se kreće na stazi brzinom većom od 40 km na sat, odnosno brzinom većom od brzine dozvoljene postavljenim znakom za cijelu stazu ili njen dio.
- (6) Motorne sanke u službi spašavanja moraju biti obilježene znakom službe. Znak se postavlja na vidnom mjestu, veličine 40 cm u prečniku.

- (7) Mehanizacija za uređenje ski staze može da se koristi u vrijeme kada žičare i ski liftovi ne rade.
- (8) Ukoliko je upotreba mehanizacije za uređenje ski staze nužna za vrijeme rada žičara i ski - liftova, skijaški centar je dužan da preduzme posebne mjere za obezbjeđenje sigurnosti skijaša.
- (9) Svako vozilo mehanizacije za uređenje ski staze koje radi na pripremanju ski staze ili se kreće na skijalištu mora da bude obojeno uočljivom bojom i opremljeno odgovarajućim svjetlima.
- (10) Svako vozilo mehanizacije za uređenje ski staze koje se nalazi zaustavljeno na stazi mora biti označeno odgovarajućim svjetlima.

Član 28.

(Održavanje u tehnički ispravnom stanju)

- (1) Skijaški centar obavezan je da žičare, ski liftove i staze za visinski prijevoz, održava i koristi u tehnički ispravnom stanju sa dovoljnim brojem obučenog osoblja.
- (2) Kada je žičara, ski lift i mehanizacija za uređenje skijaških staza u upotrebi mora se obezbijediti:
 - a) stalna kontrola rada i tehnička ispravnost;
 - b) stalno održavanje i pravilno vršenje eksploatacije;
 - c) neposredno pružanje pomoći korisnicima, posebno djeci u slučaju očigledne opasnosti ili na zahtjev korisnika;
 - d) dovoljan broj preglednih informacija i uputstava o ponašanju korisnika na sredstvima visinskog prijevoza;
 - e) stalna koordinacija između stanja na stazama i upotrebe žičare.

Član 29.

(Pravila za upotrebu žičara i ski liftova)

Pravila koja se primjenjuju na žičare i ski liftove iz Člana 28. ovog Zakona primjenjuju se i na ski liftove sa vučnim užetom ispod glave skijaša kao i ski liftove za vuču po travi.

Član 30.

(Javni prijevoz žičarom)

- (1) Prijevoz žičarom je oblik javnog prijevoza i obavlja se prema utvrđenom redu vožnje, koji mora biti uočljivo istaknut na polaznoj i završnoj stanici.
- (2) Skijaški centar obavezan je da skijaše upozori na odgovarajući način o mogućnosti oduzimanja ski passa zbog ponašanja suprotnog ovom Zakonu i pravilima o redu na skijalištu.

Član 31.

(Prekid rada žičare i ski lifta)

Skijaški centar može da prekine rad žičare ili ski lifta tek kada odgovorno lice, redar ili dežurni spasilac potvrdi da nijedno lice više ne koristi žičaru ili ski lift.

ODJELJAK G. Korišćenje i rad skijališta

Član 32.

(Djelatnosti skijaškog centra)

Skijaški centar može da obavlja djelatnosti, odnosno poslove vezane za korišćenje skijališta pod uvjetima:

- a) da uredi i opremi skijalište u skladu sa ovim Zakonom, tako da je ono bezbjedno za korisnike;
- b) da obezbijedi službu održavanja reda na skijalištu i da uredi red na skijalištu (pravila o redu na skijalištu);
- c) da obezbijedi službu spašavanja opremljenu neophodnom opremom za spašavanje;
- d) da obezbijedi pružanje hitne medicinske pomoći na skijalištu;
- e) da obezbijedi sistem veza na skijalištu i vezu sa najbližom zdravstvenom ustanovom i organom unutrašnjih poslova;
- f) da obezbijedi (dnevno i dugoročno) praćenje vremenske situacije u području gdje se nalazi skijalište (meteorološko bdijenje);
- g) da zaključi ugovor o osiguranju skijaša i drugih neposrednih korisnika skijališta od posljedica nezgoda na skijalištu;

- h) da donese plan rada za ski sezonu;
- i) da utvrdi pravila o korišćenju ski liftova i žičara, motornih sanki i mehanizacije za uređenje ski staza;
- j) da zaključi ugovor sa Kantonalnim javnim komunalnim preduzećem za redovan odvoz i zbrinjavanje otpada i smeća zaostalog na području skijališta;
- k) da zaključi ugovor sa odgovarajućim službama za zaštitu radi zaštite prirode, okoliša, šuma i voda na području skijališta u skladu sa ovim Zakonom i važećim propisima za te oblasti.

Član 33.

(Oprema skijaškog centra)

Skijaški centar mora da obezbijedi da skijalište bude opremljeno:

- a) odgovarajućim brojem mašina i uređaja za pripremu i održavanje staza, srazmjerno broju i veličini staza;
- b) razglasnim uređajem takve jačine da se može efikasno koristiti na skijalištu;
- c) sportskom i drugom opremom potrebnom za korišćenje skijališta u skladu sa ovim Zakonom i propisima donijetim na osnovu ovog Zakona.

Član 34.

(Upis u matičnu evidenciju organizacija u sportu)

Skijaški centar obavezan je da upiše skijalište u matičnu evidenciju u skladu sa zakonom kojim je uređena oblast sporta i da vodi evidencije u skladu sa tim zakonom.

Član 35.

(Stručno osposobljavanje i usavršavanje)

Skijalište može da se koristi za stručno osposobljavanje i usavršavanje u zimskim sportovima samo od strane organizacija koje ispunjavaju zakonom propisane uvjete.

Član 36.

(Javnost rada)

Skijaški centar obavezan je da obavijesti javnost preko sredstava javnog informisanja o početku i završetku korišćenja skijališta u tekućoj skijaškoj sezoni, kao i o svakom prekidu rada skijališta dužem od tri dana tokom skijaške sezone.

Član 37.

(Tehnički i vremenski uvjeti)

- (1) Takmičarsko i rekreativno skijanje, skijaška obuka i drugi oblici skijaških aktivnosti mogu se vršiti kada vremenski uvjeti omogućavaju bezbjedno korišćenje usluga na skijalištu.
- (2) Skijalište može da radi noću ukoliko postoje tehnički i vremenski uvjeti i ako je obezbijedena sigurnost skijaša.

Član 38.

(Opasnost i smanjena vidljivost)

Takmičarsko i rekreativno skijanje, skijaška obuka i drugi oblici skijaških aktivnosti ne mogu se vršiti na skijalištu:

- a) ako postoji opasnost od lavina;
- b) za vrijeme sniježne vijavice, kiše, magle zbog koje je smanjena vidljivost i vjetrovi koji ugrožavaju bezbjednost vožnje, prema tipu žičare;
- c) kod visokog snijega - svježeg koji nije utaban i na snijegu koji je usljed naglog topljenja postao suviše mekan;
- d) ako na stazama nema dovoljno snijega;
- e) ako su bezbjednosni uređaji i oznake toliko oštećeni da ne obezbijeduju sigurnost skijaša ili za njega predstavljaju opasnost, kao i za vrijeme rada mašina za utabavanje snijega;
- f) ako ne funkcioniše sistem veza na skijalištu;
- g) ako nije osigurana redarska služba, služba spašavanja i služba pružanja prve pomoći.

Član 39.

(Prekid rada na skijalištu)

- (1) Kada na skijalištu nastupe okolnosti iz člana 38. ovog Zakona, skijaški centar je dužan da prekine rad na skijalištu ili dijelu skijališta.
- (2) Prekid rada traje sve dok traju okolnosti zbog kojih je uveden.
- (3) Ukoliko se zatvaranje ski staze vrši u toku dana, korisnik je obavezan da preduzme kontrolnu vožnju kako bi osigurao da se skijaši koji se nalaze na stazi udalje iz ugroženog područja.
- (4) Skijaški centar obavezan je da objavi na pogodan način na ulazu u skijalište razloge privremenog prekida, odnosno zabrane korišćenja skijališta, ili jednog dijela skijališta.

ODJELJAK H. Spasilačka služba i služba prve pomoći

Član 40.

(Spasilačka služba i služba prve pomoći)

- (1) Skijaški centar obezbjeđuje spasilačku službu samostalno ili u saradnji sa odgovarajućom organizacijom koja je obučena za spašavanje i pružanje prve pomoći povrijeđenom odnosno ugroženom skijašu na ski stazama i sredstvima i objektima skijališta.
- (2) Broj spasilaca zavisi od dužine i težine ski staza:
 - a) teška staza - na 1 km dužine - 2 spasioca
 - b) srednje teška staza - na 1 km dužine - 1 spasilac
 - c) laka staza - na 2 km dužine - 1 spasilac
- (3) Na skijalištu mora biti jasno i vidljivo označeno sjedište službe spašavanja, a spasioci moraju nositi posebnu uniformu i oznake.

Član 41.

(Brzo dejstvo spašavanja)

Služba spašavanja mora biti tako organizovana da je uvijek spremna za brzo dejstvo spašavanja (pružanje prve pomoći i brzog transporta) skijaša koji su pretrpjeli nesreću na stazi ili njenoj zaštićenoj zoni.

Član 42.

(Mjere spašavanja)

- (1) Mjere spašavanja preduzimaju se isključivo preko lica stručno osposobljenih za spašavanje registrovanim kod Ministarstva pravde i uprave Kantona Sarajevo i spasilačkim udruženjima Kantona i Federacije.
- (2) Služba spašavanja u svom sastavu obavezno ima obučene ekipe za spašavanje skijaša sa žičare.
- (3) Opremu za spašavanje sa žičara obezbjeđuje ski centar, na način da na svakih 30 sjedećih mjesta na žičari bude jedan komplet.
- (4) Spasioci moraju imati prednost korišćenja žičara.

Član 43.

(Naknada troškova akcije spašavanja)

Skijaški centar ima pravo na naknadu troškova akcije spašavanja od osoba koje su svojim nezakonitim ponašanjem doveli do ugrožavanja života ili zdravlja ljudi ili izazvali opasnost za materijalna dobra u skladu sa opštim propisima o odgovornosti za nastalu štetu, osim ako je potreba spašavanja nastala usljed propusta u radu skijaškog centra.

Član 44.

(Jedinstvena služba spašavanja)

- (1) Skijaški centar obrazuje jedinstvenu službu spašavanja za cijelo skijalište.
- (2) Služba spašavanja djeluje u okviru skijališta.
- (3) Ukoliko u ski području u kome se nalazi skijalište ne funkcioniše služba spašavanja, skijaški centar je obavezan da u granicama ski područja organizuje spašavanje skijaša kojima je potrebna pomoć iako se nalaze izvan granica skijališta.
- (4) Skijaški centar, u slučaju iz stava (3) ovog člana, ima pravo na naknadu prouzrokovanih troškova od lica kome je pružena pomoć, osim ako je potreba za spašavanjem izazvana propustima u radu skijaškog centra.

Član 45.

(Postupanje u slučaju nesreće na skijalištu)

Služba spašavanja, odnosno spasioci, u slučaju nesreće obavezni su da utvrde identitet lica koja su učestvovala u nesreći i da obezbijede dokaze vezane za prouzrokovanje nesreće, a u slučaju nastanka smrti ili teške tjelesne povrede da neodložno obavijeste najbliži organ Ministarstva unutrašnjih poslova Kantona Sarajevo.

Član 46.

(Oprema i sredstva za spašavanje)

- (1) Oprema i sredstva za spašavanje moraju biti na skijalištu tako raspoređeni da su dostupni u najkraćem mogućem vremenu i smješteni u vidno označenom prostoru, uz stazu ili u spasavalačkom stacionaru koji mora biti smješten na najpogodnijem dijelu skijališta.
- (2) Skijaški centar mora na skijalištu obezbijediti odgovarajuću opremu i prostor za službu spašavanja i privremeno zadržavanje povrijeđenog ili iznenada oboljelog skijaša.
- (3) Skijaški centar obavezan je da na skijalištu stalno održava propisan obim opreme i sredstava za spašavanje u ispravnom stanju.
- (4) Skijaški centar obavezan je da postavi na skijalištu tablu sa opisom tzv. alpskog signala stanja nužde, koji daje skijaš kome je potrebna pomoć jer se nalazi u opasnosti.

Član 47.

(Hitna medicinska pomoć)

- (1) Skijaški centar obezbjeđuje pružanje hitne medicinske pomoći samostalno ili u saradnji sa odgovarajućom zdravstvenom ustanovom, u skladu sa Zakonom o zdravstvenoj zaštiti.
- (2) Skijaški centar obezbjeđuje, uređuje i obilježava prostor, heliodrom, za slijetanje i uzlijetanje helikoptera u službi spašavanja za spašavanje teško povrijeđenih.
- (3) Skijaški centar osigurava pružanje hitne medicinske pomoći angažovanjem odgovarajućeg broja osposobljenih lica, obezbjeđenjem odgovarajućeg prostora za prihvatanje povrijeđenih i obezbjeđenjem odgovarajuće opreme i sredstava za pružanje hitne medicinske pomoći.
- (4) Lica koja su angažovana za pružanje hitne medicinske pomoći moraju za vrijeme dežurstva nositi službenu odjeću i službenu iskaznicu, te biti opremljeni komunikacionim uređajima i opremom za hitnu medicinsku pomoć. Osoblju hitne medicinske pomoći mora biti obezbjeđena prednost u korišćenju žičara, kao i druge prednosti vezane za obavljanje njihove djelatnosti.

Član 48.

(Bliži uvjeti u pogledu prostora, opreme i obilježavanja službe spašavanja)

Bliže uvjete u pogledu prostora, opreme i obilježavanja službe spašavanja propisat će ministar Ministarstva kulture i sporta Kantona Sarajevo.

Član 49.

(Pravila o redu na skijalištu)

- (1) Skijaški centar obavezan je da vidno istakne pravila o redu na skijalištu, cijene za korišćenje uređaja, opreme, prostora i usluga na skijalištu, kao i radno vrijeme skijališta i žičara i da ih se pridržava u svom poslovanju.
- (2) Pravilima o redu iz stava (1) ovog člana bliže se uređuju, u skladu sa zakonom, prava i obaveze skijaša i drugih lica koja upotrebljavaju skijalište, način održavanja reda na skijalištu, vrijeme korišćenja skijališta, radno vrijeme žičara, pravila o organizovanju sportskih priredbi na skijalištu, upozorenja na eventualne opasnosti usljed vremenskih i sniježnih prilika i druga pitanja utvrđena ovim Zakonom koja se odnose na obezbjeđenje reda na skijalištu.

Član 50.

(Šef staza)

- (1) Skijaški centar obavezan je da ima zaposleno lice sa odgovarajućim sportskim stručnim zvanjem za staranje o bezbjednosti i redu na skijalištu (šef staza).
- (2) Šef staza mora da ima položen ispit za redara.
- (3) Ski staze ne mogu početi da se koriste u toku dana ukoliko šef staza nije to odobrio, na osnovu procjene da su ispunjeni svi uvjeti za bezbjedno korišćenje staza.

Član 51.

(Redarska služba)

- (1) Skijaški centar obavezan je da za vrijeme rada skijališta obezbijedi redarsku službu koja mora imati odgovarajući broj redara, kako bi efikasno osigurala bezbjedno korišćenje skijališta (patrole, dežurna mjesta i dr.), u skladu sa odredbama ovog Zakona i pravilima o redu na skijalištu.
- (2) Redarsku službu može obavljati lice koje ima završenu srednju školu i položi ispit za redara.
- (3) Broj angažovanih redara određuje se prema konkretnim okolnostima skijališta, a naročito prema očekivanoj učestalosti korišćenja staza i broja, težine, veličine i preglednosti staza.
- (4) Redar je obavezan da za vrijeme obavljanja redarske službe nosi odjeću i oznake koje ga jasno identifikuju kao redara.
- (5) Ministar privrede Kantona Sarajevo za poslove turizma propisat će način i program polaganja ispita za redara, sticanje ovlaštenja za obavljanje poslova redara, izgled i način izdavanja legitimacije redara.
- (6) Ski centar je obavezan obezbijediti da se na info table postavi raspored dežurstva, kopije iskaznica dežurnih redara sa fotografijama i brojevima njihovih službenih telefona.

Član 52.

(Dužnosti redara)

- (1) Redar u vršenju svojih dužnosti ovlašten je da:
 - a) privremeno obustavi, do konačne odluke šefa staza, upotrebu skijališta ili nekog njegovog dijela na kome održava red, ako postoje okolnosti u kojima upotreba staze nije dozvoljena;
 - b) upozori, odnosno udalji sa skijališta ili njegovog dijela lica koja se ne pridržavaju pravila utvrđenih ovim Zakonom i pravila o redu na skijalištu, koja ne raspolazu ispravnom skijaškom opremom, koja prave nered na polaznim stanicama žičara ili su pod uticajem alkohola ili droge;
 - c) prekine rad žičara ski liftova dok se ne uspostavi red na ulaznim ili izlaznim stanicama žičara;
 - d) obavijesti nadležnu policijsku upravu ukoliko se skijaš ili drugi neposredni korisnik skijališta u korišćenju skijališta ne pridržava utvrđenog reda na skijalištu;
 - e) uskrati jednu ili više vožnji žičarom licu koje svojim ponašanjem ugrožava ili može ugroziti bezbjednost upotrebe skijališta, odnosno žičare (pijana lica i lica pod uticajem droge, lica koja se ne pridržavaju utvrđenih pravila o ponašanju na skijalištu, lica koja sa sobom nose nedozvoljene predmete i sl.).
- (2) Kada skijaš ili drugo lice na skijalištu postupi suprotno nalogima redara, pruži fizički otpor ili svojim ponašanjem narušava javni red i mir ili ugrožava život, ličnu sigurnost ili imovinu građana, o tome se bez odlaganja obavještava ovlašteno službeno lice Ministarstva unutrašnjih poslova Kantona Sarajevo.

Član 53.

(Obaveza pridržavanja pravila o redu na skijalištu)

- (1) Skijaši su obavezni da se pridržavaju pravila o redu na skijalištu i uputstava i upozorenja koje im daju redari.
- (2) Skijaš je obavezan da:
 - a) se na stazi ponaša tako da druge ne ugrožava ili povrijeđuje;
 - b) vozi pažljivo i da brzinu i način vožnje prilagodi svojim znanjima i uvjetima staze (okoline) i dijela staze,

- vremenskim i sniježnim prilikama, kao i broju skijaša na stazi;
- c) izabere liniju (pravac, smjer) vožnje tako da skijaše koji voze ispred njega ne ugrožava i da je u mogućnosti da blagovremeno izbjegne sudar sa bilo kojim licem ili objektom ispred sebe;
 - d) druge skijaše pretiče, bilo lijevo ili desno, uvijek na takvom rastojanju koje im daje dovoljno prostora za sve njihove pokrete (kretanja);
 - e) kada želi da se uključi u vožnju na neku stazu ili kada nakon zaustavljanja na stazi nastavlja vožnju obavezno se uvjeri, gledanjem iznad i ispod, da može to da učini bez opasnosti po sebe ili druge;
 - f) u slučaju kada se penje, odnosno vraća uz stazu ili kada pješke silazi za kretanje koristi isključivo ivicu staze;
 - g) se uz stazu ne penje pješke nego da koristi žičaru;
 - h) poštuje postavljene oznake i signalizaciju;
 - i) u slučaju nesreće na stazi pruži drugome pomoć;
 - j) u slučaju nesreće, nezavisno da li je svjedok ili učesnik, nadležnoj službi skijaškog centra (redarskoj ili spasilačkoj) pruži svoje identifikacione podatke;
 - k) poštuje uputstva redara;
 - l) skija sa ispravnom i odgovarajućom opremom, a posebno da koristi skije koje su opremljene sredstvom (vezovi i dr.) koje je u stanju da zaustavi skiju u slučaju da se odvoji od skijaša;
 - m) ne ostavlja na stazi ili baca na stazu predmete i materijale koji mogu da ometaju ili ugroze bezbjednost drugih skijaša;
 - n) za skijanje na skijalištu koristi isključivo markiranu stazu, osim u slučaju opasnosti;
 - o) ako se skijalište nalazi u zakonom zaštićenom području poštuje pravila koja je za korišćenje zaštićenog područja utvrdilo, u skladu sa zakonom, pravno lice koje upravlja zaštićenim područjem;
 - p) da svoj otpad odlaze isključivo u posude namijenjene za odlaganje otpada;
 - r) skijanje prilagodi uvjetima staze kada su nepovoljne vremenske prilike povećale stepen težine staze.
- (3) Skijaš ne smije:
- a) skijati na skijalištu, odnosno stazi koja je označena kao zatvorena;
 - b) uništavati, uklanjati, oštećivati ili na drugi način ugrožavati postavljene oznake i signalizaciju na skijalištu;
 - c) na bilo koji način ugrožavati stubove žičara, mašine za pripremu staze i drugu opremu na stazi;
 - d) skijati na stazi ukoliko je pod dejstvom alkohola, droge ili nekog psihoaktivnog lijeka, odnosno sredstva koje negativno utiče na njegovu sposobnost;
 - e) napustiti mjesto sudara sa drugim skijašem prije nego što redarskoj službi korisnika da identifikacione podatke, osim u slučaju kada je to nužno radi pružanja hitne medicinske pomoći povrijeđenom, u kom slučaju će se nakon predaje povrijeđenog na medicinsko staranje javiti najbližoj redarskoj službi skijaškog centra;
 - f) skijati unazad (natraške);
 - g) postavljati bilo kakve oznake ili ostavljati bilo kakve stvari (bez nadzora) na skijalištu bez dozvole skijaškog centra;
 - h) da se zaustavlja na usponu ili na vučnoj stazi ski lifta ako bi zaustavljanje moglo da ugrozi skijaše koji se prijevoze.
- (4) Snowborderi, trkači i hodači na skijama obavezni su da, pored mjera iz stava (2) ovog člana, preduzmu i druge mjere koje odgovaraju prirodi konkretne zimske sportske aktivnosti, u skladu sa odgovarajućim međunarodnim sportskim pravilima (FIS pravila).

Član 54.

(Pravila na skijalištu)

- (1) U cilju osiguranja bezbjednosti, skijaš je dužan da se prilikom vožnje žičarom i ski liftom pridržava i sljedećih pravila:

- a) ne smije da djeluje u toku vožnje žičarom na bilo koji način koji može da utiče na siguran rad i funkcionisanje instalacija žičare;
 - b) ne smije da mijenja, premješta, kvari uređaje i materijal bilo koje vrste koji služi žičari ili ski liftu;
 - c) ne smije da se penje na pogonske stanice i linijske stubove ili da zauzima mjesto koje nije namijenjeno korisnicima žičare ili ski lifta ili da ometa pristup tim mjestima;
 - d) ne smije bez opravdanih razloga da aktivira sigurnosne uređaje koji su mu pristupačni ili da namjerno aktivira sigurnosnu rampu;
 - e) ne smije da namjerno otpusti vučnu napravu prije mjesta određenog za to ili prije izlazne stanice;
 - f) ne smije da krivuda duž trase vučenja ski lifta, da izlazi iz trase vučenja, da ostaje na trasi vučenja u slučaju pada, da namjerno otpusti i baci vučnu napravu na linijski stub, da sjeda na vučnu napravu ili da zaljulja vučnu napravu na izlaznoj stanici;
 - g) ne smije da se njiše u sedištu žičare, da se vozi bez spuštenog sigurnosnog rama, da ne upotrebljava naslon za noge, da iskače iz sedišta duž trase žičare i da ljulja sedište na izlaznoj stanici;
 - h) ne smije da trake štapova drži na zglobovima ruku;
 - i) ne smije da se zadržava na izlaznoj stanici;
 - j) ne smije da se zaustavlja na usponu, na vučnoj stazi ski lifta ili bilo kojoj površini;
 - k) ne smije u toku prijevoza žičarom ili ski liftom da baca ili odstranjuje bilo kakve predmete, osim po nalogu službenog lica skijaškog centra;
 - l) ne smije da se ukrca na žičaru koja ima oznaku da je zatvorena;
 - m) ne smije da se ponaša suprotno znakovima i uputstvima postavljenim u skladu sa ovim Zakonom ili bilo kojoj usmenoj instrukciji (uputstvo ili obavještenje) od strane službenih lica skijaškog centra koje se odnosi na bezbjedno korišćenje žičare;
 - n) ne smije da se ukrca ili iskrca sa žičare na mjestima koja nisu za to određena i koja nisu pod kontrolom skijaškog centra (izvan stanica), osim u slučaju prekida vožnje i kada je radnja ukrcavanja i iskrcavanja bezbjedna;
 - o) ne smije da se iskrca sa žičare koja je stala u toku vožnje bez nadzora službenih lica skijaškog centra;
 - p) ne smije da koristi žičaru za prijevoz ako nema dovoljno fizičkih sposobnosti ili znanja i vještine za bezbjedno korišćenje instalacija žičare, odnosno usluge prijevoza;
 - r) da se pridržava pravila o ukrcavanju, vožnji i silasku utvrđenih pravilima o redu na skijalištu.
- (2) Pravila iz stava (1) ovog člana, ski centar mora istaći na vidnim mjestima koja su dostupna skijašima.

Član 55.

(Obavijest početka ski sezone MUP-u)

- (1) Prije početka ski sezone skijaški centar obavezan je da obavijesti Ministarstvo unutrašnjih poslova Kantona Sarajevo o datumu početka ski sezone i da zatraži pomoć za održavanje reda na skijalištu u toku sezone.
- (2) Pripadnici organa unutrašnjih poslova, koji održavaju red na skijalištu, moraju biti obučeni za upotrebu skija i motornih sanki.
- (3) Kada skijaški centar u toku skijaške sezone očekuje veliki broj skijaša na skijalištu mora pravovremeno obavijestiti nadležni organ unutrašnjih poslova i zatražiti dodatnu pomoć za održavanje reda na skijalištu i uređenje saobraćajnog prometa za dolazak i odlazak sa skijališta.

Član 56.

(Obaveze vođe organizovane grupe)

- (1) Vođa grupe koji na skijalište ili poligon dovodi organizovanu grupu djece ili skijaša početnika dužan je da se stara o njihovom bezbjednom skijanju. Prije početka skijanja vođa

- grupe mora upozoriti redare na grupu ili početnike kojima redari moraju posvetiti posebnu pažnju.
- (2) Vođa grupe mora ispunjavati naloge redara i prekinuti skijanje grupe ili početnika ako njihovo skijanje nije bezbjedno.
 - (3) U slučaju zaustavljanja grupe iz stava (1) ovog člana na ski stazi, vođa grupe mora postaviti odgovarajući znak upozorenja na ski stazi iznad pozicije zaustavljene grupe.

ODJELJAK I. Organizovanje sportskih priredbi

Član 57.

(Organizovanje sportskih priredbi na skijalištu)

- (1) Na skijalištu se mogu organizovati sportske priredbe (takmičenja, uključujući treninge i manifestacije) uz saglasnost skijaškog centra, pod uvjetima i na način utvrđenim ovim Zakonom, zakonom kojim se uređuje oblast sporta, zakonom o javnom okupljanju, propisima donijetim na osnovu ovih zakona i pravila nadležnog sportskog saveza i međunarodne skijaške federacije (FIS).
- (2) Ski staza može da se koristi za takmičenja i treninge za takmičenja samo ako je uređena i homologizovana u skladu sa zakonom i odgovarajućim sportskim pravilima.
- (3) Za vrijeme sportske priredbe organizator sportske priredbe, pored prava i obaveza utvrđenih propisima kojima je uređena oblast sporta i sportskim pravilima nadležnog sportskog saveza za sportske priredbe, ima i prava i obaveze koji su ovim Zakonom utvrđeni za skijaški centar, ako sporazumom između skijaškog centra i organizatora nije drugačije utvrđeno.

Član 58.

(Pristup skijalištu na kome se održava takmičenje)

- (1) Na skijalištu odnosno njegovom dijelu na kome se održava takmičenje odnosno trening za takmičenje, pristup u toku održavanja takmičenja i treninga, mogu imati samo takmičari i službena lica organizatora, medicinsko osoblje i pripadnici službe spašavanja.
- (2) Službena lica organizatora obavezna su da blagovremeno obilježe odgovarajućim znakovima i zgrade ski staze na kojima će se održati takmičenje odnosno trening za takmičenje.
- (3) Pristupne staze za gledalište moraju biti uređene, vidno obilježene i ograđene.
- (4) Organizator priredbe obavezan je da po završetku priredbe, prije otvaranja skijališta za redovnu upotrebu, ukloni oznake, uređaje, rekvizite i druge predmete postavljene radi održavanja priredbe.

Član 59.

(Skijaško takmičenje od interesa za Kanton Sarajevo)

- (1) Skijaški centar obavezan je da omogući korišćenje skijališta za organizovanje skijaškog takmičenja od interesa za Kanton Sarajevo, koje je Ministarstvo kulture i sporta Kantona Sarajevo, uvrstilo u program međunarodnih skijaških sportskih takmičenja i da za vrijeme održavanja takmičenja režim rada skijališta prilagodi potrebama takmičarskih uvjeta.
- (2) Korišćenje skijališta iz stava (1) ovog člana reguliše se ugovorom između organizatora priredbe i skijaškog centra.

ODJELJAK J. Podučavanje skijanju

Član 60.

(Škola skijanja)

- (1) Usluge podučavanja skijanju na skijalištu može da pruža pravno lice ili preduzetnik (u daljem tekstu: škola skijanja), uz saglasnost skijaškog centra, koja ispunjava slijedeće uvjete:
 - a) da je registrovana za obavljanje djelatnosti sportskog podučavanja;
 - b) da ima vidno obilježeno mjesto za okupljanje polaznika;
 - c) da ima zaključen ugovor o osiguranju korisnika usluga podučavanja od posljedica nezgoda;
 - d) da ima angažovana lica sa važećom licencom za neposredno podučavanje.

- (2) Preduzetnik koji sam ispunjava uvjete propisane za instruktora skijanja, može da se bavi neposrednim podučavanjem skijanja i bez angažovanja drugih lica.
- (3) Neposrednim podučavanjem može da se bavi samo instruktor skijanja sa važećom licencom.
- (4) Uz instruktora može biti angažovan i asistent (samo za početnike škole skijanja).
- (5) Instruktor skijanja i asistent moraju da za vrijeme podučavanja nose oznake i odjeću koja ih jasno identifikuju kao lica koja podučavaju skijanju.
- (6) Škola skijanja može da se bavi samo onom vrstom podučavanja i one grupe polaznika koja odgovara sadržini licence koju ima instruktor skijanja koji je angažovan u školi.

Član 61.

(Način korišćenja skijališta za školu skijanja)

Škola skijanja može da koristi skijalište za podučavanje skijanju na slijedeći način:

- a) da upozori redare na ski stazi na lica koja se podučavaju na stazi;
- b) da svojim učenicima prenese potrebna znanja vezana za tehniku skijanja i pravila ponašanja na skijalištu;
- c) da prije početka kursa testira učenike i razvrsta ih u homogene grupe prema uzrastu, znanju skijanja i fizičkim sposobnostima;
- d) da pruži hitnu medicinsku pomoć učeniku u slučaju potrebe;
- e) da za vrijeme podučavanja ima obezbijeden priručni komplet prve pomoći;
- f) da njeni učenici poštuju obaveze vezane za ponašanje na stazi utvrđene ovim Zakonom i pravilima o redu na skijalištu.

Član 62.

(Obuka za početnike)

Početni kurs (obuka) škole skijanja može da se obavlja samo na posebno uređenim, izdvojenim i označenim stazama ili padinama pogodnim za skijanje.

Član 63.

(Ravnopravni uvjeti za korišćenje skijališta)

Skijaški centar je obavezan da obezbijedi ravnopravne uvjete u pogledu korišćenja skijališta svim školama skijanja, pod uvjetom da su ispunjene odredbe člana 60. ovog Zakona.

Član 64.

(Obuka bez sticanja dobiti)

- (1) Sportske organizacije, obrazovne ustanove, kao i državni organi i organizacije mogu da koriste skijalište za podučavanje skijanju isključivo za svoje članove i korisnike, bez svrhe sticanja dobiti.
- (2) Organi i organizacije iz stava (1) ovog člana ne mogu javno oglašavati i reklamirati podučavanje skijanju.

Član 65.

(Odgovarajuće sportsko zvanje i licenca nadležnog saveza)

- (1) Instruktor skijanja može da se bavi podučavanjem skijanja pod uvjetom da posjeduje odgovarajuće sportsko zvanje i odgovarajuću licencu nadležnog sportskog saveza, u skladu sa ovim Zakonom i zakonom kojim se uređuje oblast sporta.
- (2) Uvjete i postupak izdavanja licence instruktorima skijanja i trajanje izdate licence uređuje nadležni sportski savez.
- (3) Nadležni sportski savez može da izda licencu instruktoru skijanja ukoliko ispunjava uvjete utvrđene zakonom i pravilima saveza.
- (4) Instruktor skijanja je obavezan da se stručno usavršava u skladu sa zakonom i sportskim pravilima nadležnog sportskog saveza.
- (5) Ministarstvo kulture i sporta Kantona Sarajevo daje saglasnost na pravila nadležnog sportskog saveza kojima se uređuju uvjeti i postupak izdavanja licence i stručno usavršavanje instruktora skijanja.

- (6) Nadležni sportski savez poslove iz st. (2) i (3) ovog člana obavlja kao povjerene.

Član 66.

(Licenca ISIA - Međunarodne asocijacije instruktora sporta)

Stranac instruktor skijanja može da se na skijalištu bavi neposrednim podučavanjem skijanju pod uvjetom da posjeduje važeću licencu ISIA (Međunarodna asocijacija instruktora skijanja).

POGLAVLJE III. NADZOR

Član 67.

(Upravni i inspeksijski nadzor)

- (1) Upravni nadzor nad izvršavanjem odredaba ovog Zakona i propisa donijetih na osnovu njega, kao i drugih propisa kojima se uređuje djelatnost na skijalištu, vrši Ministarstvo kulture i sporta Kantona Sarajevo.
- (2) Inspeksijski nadzor nad primjenom ovog Zakona i propisa donijetih na osnovu njega vrši Kantonalna uprava za inspeksijske poslove Kantona Sarajevo.
- (3) Inspeksijski nadzor nad organizovanjem sportskih priredbi na skijalištima i izdavanjem licenci instruktorima skijanja vrši Ministarstvo kulture i sporta putem inspektora za sport.
- (4) Inspeksijski nadzor nad primjenom ovog Zakona i propisa donesenih na osnovu njega vrši Kantonalna uprava za inspeksijske poslove u dijelu koji se odnosi na sredstva vertikalnog transporta (žičare i ski liftovi).
- (5) Ministarstvo unutrašnjih poslova Kantona Sarajevo vrši kontrolu upotrebe motornih sanki, a ovlašćeni i certificirani organi i ustanove za vršenje tehničkog pregleda specijalnih vozila i radnih mašina vrše kontrolu tehničke ispravnosti motornih sanki i mehanizacije za uređenje ski staze, a po osnovu ugovora koji sa istim obavezno zaključuje Skijaški centar.

Član 68.

(Nadležnosti turističke inspekcije i ovlaštenja turističkog inspektora)

- (1) U vršenju inspeksijskog nadzora turistički inspektor ovlašćen je da:
 - a) kontroliše ispunjenost uvjeta za obavljanje djelatnosti iz člana 32. ovog Zakona;
 - b) pregleda prostore i prostorije u kojima se obavlja djelatnost i pružaju usluge na skijalištu, ugovore, evidencije, isprave i drugu dokumentaciju potrebnu za utvrđivanje zakonitosti poslovanja skijaškog centra, kao i drugih pravnih lica i preduzetnika koji obavljaju djelatnost na skijalištu;
 - c) kontroliše da li skijaši i druga lica koriste skijalište na propisan način i sa odgovarajućom opremom.
- (2) Turistički inspektor ovlašćen je da:
 - a) privremeno zabrani korišćenje skijališta ako skijaški centar ne ispunjava uvjete utvrđene ovim Zakonom;
 - b) privremeno zabrani rad skijališta ili dijela skijališta ukoliko nastupe okolnosti iz člana 38. ovog Zakona, a skijaški centar nije prekinuo rad skijališta;
 - c) privremeno zabrani rad licu koje nije registrovano za obavljanje djelatnosti i pružanje usluga na skijalištu ili obavlja djelatnost ili pruža usluge suprotno odredbama ovog Zakona i propisa donijetih na osnovu njega;
 - d) privremeno oduzme evidencije, dokumenta i druga dokazna sredstva od značaja za utvrđivanje činjeničnog stanja i privremeno oduzme predmete i sredstva čija upotreba nije dozvoljena u okviru sporta, kao i predmete i sredstva kojima se vrše nedozvoljene radnje;
 - e) podnese prijavu nadležnom organu za učinjeno krivično djelo i podnese zahtjev za pokretanje prekršajnog postupka ili izda prekršajni nalog;
 - f) preduzme druge mjere i radnje za koje je ovlašćen zakonom.

- (3) Inspektor će rješenjem utvrditi vrijeme trajanja privremene zabrane obavljanja djelatnosti, kao i rok u kome su lica koja obavljaju djelatnosti i pružaju usluge utvrđene ovim Zakonom, dužna da otklone nedostatke zbog kojih je mjera izrečena.

- (4) Protiv rješenja turističkog inspektora može se izjaviti žalba direktoru Kantonalne uprave za inspeksijske poslove Kantona Sarajevo, u roku od 15 dana od dana prijema rješenja.

- (5) Žalba izjavljena na rješenje iz stava (4) ovog člana ne odlaže njegovo izvršenje.

Član 69.

(Ovlaštenja inspektora za sport)

- (1) U vršenju inspeksijskog nadzora nad organi zovanj em skijaških sportskih priredbi i izdavanja licenci instruktorima skijanja, inspektor za sport je ovlašćen da naloži otklanjanje utvrđenih nepravilnosti i nedostataka u određenom roku i da zabrani održavanje sportske priredbe na skijalištu, ako nije obezbijeđeno njeno nesmetano i bezbjedno održavanje.
- (2) Protiv rješenja inspektora za sport iz stava (1) ovog člana može se izjaviti žalba ministru kulture i sporta Kantona Sarajevo, u roku od 15 dana od dana prijema rješenja.
- (3) Žalba izjavljena na rješenje iz stava (2) ovog člana ne odlaže njegovo izvršenje.

Član 70.

(Javni interesi Kantona, Grada i općina)

- (1) Javni interes Kantona je:
 - a) izgradnja, obnova i održavanje javnih skijališta i drugih zimskih sportskih objekata i terena od interesa za Kanton,
 - b) vrhunski sportski rezultat u oblasti zimskih sportova,
 - c) usavršavanje stručnog kadra za zimske sportove,
 - d) razvojno-istraživačka i promotivna djelatnost,
 - e) međukantonalna, međuentitetska i međunarodna saradnja,
 - f) koordinacija ukupnih sportskih aktivnosti,
 - g) evidencija,
 - h) dodjela javnih priznanja i nagrada zaslužnim djelatnicima u oblasti zimskih sportova.
- (2) Grad Sarajevo i općine sa područja Kantona Sarajevo će svojim odlukama utvrditi javni interes Grada, odnosno općine u roku od šest mjeseci od dana stupanja na snagu ovog Zakona.
- (3) Za provođenje javnog interesa iz stava (2) ovog člana, Grad i općina obezbjeđuju sredstva u Budžetu Grada, odnosno općine.
- (4) Nadležni organi općina sa područja Kantona Sarajevo u saradnji sa Ski centrom će posebnom odlukom propisati površine u okviru skijališta za kretanje motornih vozila, motornih sanki i mehanizacije iz člana 27. ovog Zakona.
- (5) Radi ostvarivanja javnih interesa iz st. (1) do (3) ovog člana organi i službe Grada i općina nadležni za organizovanje i praćenje sportske djelatnosti, obavezni su da sarađuju međusobno i sa organima Kantona.

POGLAVLJE IV. KAZNENE ODREDBE

Član 71.

(Novčane kazne za prekršaj pravnih i odgovornih lica)

- (1) Novčanom kaznom od 1.500,00 do 15.000,00 KM kaznit će se za prekršaj pravno lice ako:
 - a) ne učini skijalište dostupno svim korisnicima pod jednakim uvjetima (član 4. stav (2));
 - b) ne kontroliše opšte stanje skijališta i ne održava ga u ispravnom stanju, odnosno u stanju koje omogućava namjensko i bezbjedno korišćenje staza (član 22. stav (1));
 - c) ne održava žičaru i zaštitno područje oko žičare u stanju koje omogućava bezbjedno korišćenje žičare (član 22. stav (5));
 - d) ne uredi i opremi skijalište tako da je bezbjedno za korisnike (član 32. tačka a));
 - e) na skijalištu ne obezbijedi redarsku službu, službu spašavanja i službu hitne medicinske pomoći (član 32. tač. b) do d));

- f) koristi skijalište suprotno članu 38. ovog Zakona;
 - g) ne prekine rad skijališta ili njegovog dijela, kada nastupe okolnosti iz člana 39. ovog Zakona;
 - h) ne omogući korišćenje skijališta za organizovanje skijaškog takmičenja (član 59.);
 - i) koristi skijalište iako je privremeno zabranjeno korišćenje (član 68. stav (2) tač. a) i b));
 - j) održava sportsku priredbu i pored zabrane (član 69.).
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 300,00 do 3.000,00 KM.

Član 72.

(Novčane kazne za prekršaj pravnih i odgovornih lica)

- (1) Novčanom kaznom od 1.000,00 do 10.000,00 KM kaznit će se za prekršaj pravno lice ako:
- a) dozvoli upražnjavanje specijalizovanih zimskih sportskih aktivnosti izvan ski poligona (član 4. stav (3));
 - b) odstupi od propisanih uvjeta za uređenje ski staza (član 8.);
 - c) posebno ne obilježi i ne osigura opasna mjesta na ski stazi (član 9. stav (2));
 - d) ne klasifikuje i ne obilježi staze prema stepenu težine (član 19.);
 - e) dozvoli upotrebu motornih sanki na ski stazi (član 27. stav (2));
 - f) nema obezbijeden sistem veza na skijalištu i vezu sa najbližom zdravstvenom ustanovom i organom unutrašnjih poslova (član 32. tačka e));
 - g) na ulazu u skijalište ne objavi na pogodan način razloge privremenog prekida odnosno zabrane korišćenja skijališta (član 39. stav (4)).
- (2) Za prekršaj iz stava (1) ovog člana kazniće se odgovorno lice u pravnom licu novčanom kaznom od 200,00 do 2.000,00 KM.

Član 73.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 5.000,00 KM kaznit će se za prekršaj pravno lice ako:
- a) upotrebljava mehanizaciju za uređenje ski staze za vrijeme rada žičara i ski- liftova, a ne preduzme posebne mjere za obezbjeđenje sigurnosti skijaša (član 27. st. (7) i (8));
 - b) ne propiše pravila o redu na skijalištu (član 32. tačka b));
 - c) ne pridržava se utvrđenog plana rada za ski sezonu (član 32. tačka h));
 - d) ne zaključi ugovor sa Kantonalnim javnim komunalnim preduzećem za redovan odvoz i zbrinjavanje otpada i smeća zaostalog na području skijališta (član 32. tačka j));
 - e) ne zaključi ugovor sa odgovarajućim službama za zaštitu radi zaštite prirode, okoliša, šuma i voda na području skijališta u skladu sa ovim Zakonom i važećim propisima za te oblasti (član 32. tačka k));
 - f) ne rasporedi opremu i sredstva za spašavanje tako da su dostupna u najkraćem mogućem vremenu i ne smjesti ih u vidno označenom prostoru (član 46. stav (1));
 - g) ne obezbijedi na skijalištu odgovarajuću opremu i prostor za službu spašavanja i zadržavanje povrijeđenog ili iznenada oboljelog skijaša (član 46. stav (2)).
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 100,00 do 1.000,00 KM.

Član 74.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 2.000,00 KM kaznit će se za prekršaj pravno lice ako:
- a) ne označi granice skijališta na ključnim mjestima oznakama koje su vidljive u uvjetima normalne vidljivosti (član 20. stav (1));
 - b) vozila mehanizacije za uređenje ski staza ne oboji uočljivom bojom i ne opremi odgovarajućim svjetlima (član 27. stav (9));

- c) ne pruži neposrednu pomoć korisnicima, posebno djeci, u slučaju očigledne opasnosti ili na zahtjev korisnika (član 28. stav (2) tačka c));
- d) prekine rad žičara i ski liftova u trenutku kada jedno ili više lica koristi žičaru ili ski lift (član 31.);
- e) ne obezbijedi praćenje vremenske situacije u području gdje se nalaze skijališta (član 32. tačka f));
- f) dužim prekidima rada skijališta ne obavijesti javnost putem sredstava javnog informisanja (član 36.);
- g) dozvoli rad skijališta noću, a za to ne postoje tehnički i vremenski uvjeti i nije obezbijedena sigurnost skijaša (član 37. stav (2));
- h) vidno i jasno ne označi sjedište službe spašavanja (član 40. stav (3));
- i) ne istakne pravila o redu, radno vrijeme skijališta i žičara, cijene za korišćenje uređaja, opreme, prostora i usluga na skijalištu i ne pridržava ih se u poslovanju (član 49. stav (1));
- j) odredi za šefa staza lice koje ne ispunjava uvjete iz člana 50. st. (1) i (2) ovog Zakona;
- k) redarsku službu obavlja lice koje ne ispunjava uvjete iz člana 51. stav (2) ovog Zakona;
- l) ne obavijesti nadležne organe o tačnom početku ski sezone (član 55. stav (1));
- m) organizuje sportsku priredbu na skijalištu suprotno odredbama člana 57. ovog Zakona;
- n) dozvoli pristup dijelu skijališta na kome se održava takmičenje licu koje nije takmičar ili službeno lice organizatora (član 58. stav (1));
- o) organizator priredbe ne ukloni oznake, uređaje, rekvizite i druge predmete postavljene radi održavanja priredbe (član 58. stav (4));
- p) pruža usluge podučavanja skijanja suprotno članu 60. ovog Zakona;
- r) početni kurs skijanja obavlja suprotno čl. 61. i 62. ovog Zakona;
- s) izda licencu instruktoru skijanja iako nisu ispunjeni propisani uvjeti (član 65. stav (3)).

- (2) Za prekršaj iz stava (1) tač. p) i r) ovog člana kazniće se i preduzetnik novčanom kaznom od 1.000,00 do 10.000,00 KM.

- (3) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 200,00 do 2.000,00 KM.

Član 75.

(Novčane kazne za prekršaj fizičkih lica)

Novčanom kaznom od 150,00 do 1.500,00 KM kazniće se za prekršaj fizičko lice:

- a) ako koristi motorne sanke suprotno članu 27. stav (5) ovog Zakona;
- b) šef staza koji suprotno članu 50. stav (3) ovog Zakona odobri korišćenje staze iako nisu ispunjeni svi uvjeti za njeno bezbjedno korišćenje;
- c) ako ne postupi po nalogima redara (član 52. stav (1));
- d) skijaš ako vožnjom teže ugrozi bezbjednost na ski stazi (član 53. stav (2) tačka b));
- e) skijaš ako uništi, ukloni ili ošteti oznake ili signalizaciju na skijalištu (član 53. stav (3) tačka b)).

Član 76.

(Novčane kazne za prekršaj fizičkih lica)

Novčanom kaznom na licu mjesta u iznosu od 100,00 KM kazniće se za prekršaj fizičko lice ako:

- a) koristi motorne sanke suprotno članu 27. stav (2) ovog Zakona;
- b) kao voda grupe djece ili skijaša početnika ne upozori redara na grupu ili ne ispunji naloge redara iz člana 56. ovog Zakona;
- c) radi kao instruktor skijanja, a nema licencu nadležnog sportskog saveza (član 65. stav (1) ili ne posjeduje važeću licencu ISIA (član 66.).

Član 77.

(Novčane kazne za prekršaj fizičkih lica)

Novčanom kaznom na licu mjesta u iznosu od 50,00 KM kaznit će se za prekršaj fizičko lice ako:

- kao spasilac ne nosi vidne oznake na uniformi koje ga identifikuju kao spasioca (član 40. stav (3));
- za vrijeme obavljanja redarske službe ne nosi odjeću i oznake koje ga jasno identifikuju kao redara (član 51. stav (4));
- ponaša se suprotno odredbama član 53. i 54. ovog Zakona;
- kao instruktor skijanja za vrijeme podučavanja ne nosi oznake i odjeću koja ga jasno identifikuje kao lice koje podučava skijanju (član 60. stav (5)).

POGLAVLJE V. PRIJELAZNE I ZAVRŠNE ODREDBE

Član 78.

(Primjena drugih zakona i propisa)

- Kod izgradnje, uređenja i održavanja javnih skijališta i drugih zimskih sportskih objekata njihovi vlasnici i ski centri, obavezni su da primjenjuju Evropsku konvenciju o pravima osoba sa invaliditetom, Konvenciju o pravima osoba sa invaliditetom namijenjenu djeci, kao i Zakon o sportu u Bosni i Hercegovini i Zakon o sportu Kantona Sarajevo u cilju obezbjeđenja ravnopravnog pristupa invalidnih osoba tim objektima.
- Kod izgradnje, uređenja i održavanja javnih skijališta i drugih zimskih sportskih objekata njihovi vlasnici i ski centri, obavezni su da odgovarajuće primjenjuju Zakon o zaštiti okoliša, Zakon o zaštiti prirode, Zakon o zaštiti voda i Zakon o upravljanju otpadom, kao i Zakone kojim se pojedina zaštićena područja, pejzaži ili vode proglašavaju zaštićenim spomenikom prirode.

Član 79.

(Ravnopravnost spolova)

Odredbe ovog Zakona odnose se podjednako na osobe muškog i ženskog spola, bez obzira na rod imenice upotrijebljene u tekstu ovog Zakona.

Član 80.

(Rok za donošenje podzakonskih propisa)

Propisi koji se donose na osnovu ovlaštenja iz čl. 23., 25. stav (5), 48. i 51. stav (5) ovog Zakona biće donijeti u roku od šest mjeseci od dana stupanja na snagu ovog Zakona.

Član 81.

(Rok za usklađivanje općih akata)

Preduzeća i druga pravna lica uskladi će svoje opće akte i poslovanje sa odredbama ovog Zakona u roku od šest mjeseci od dana njegovog stupanja na snagu.

Član 82.

(Rok za ispunjavanje uvjeta zaposlenih lica)

Skijaški centar je dužan da obezbijedi da zaposlena, odnosno angažovana lica na poslovima šefa staza i redara ispune uvjete utvrđene ovim Zakonom u roku od dva mjeseca od dana stupanja na snagu ovog Zakona.

Član 83.

(Prestanak primjene Zakona i Pravilnika)

Stupanjem na snagu ovog Zakona na području Kantona Sarajevo prestaje primjena:

- Zakona o javnim smučarskim terenima ("Službeni list Bosne i Hercegovine", broj 31/80),
- Pravilnika o znakovima na javnim smučarskim terenima i smučarskim stazama ("Službeni list Bosne i Hercegovine", broj 27/81),
- Pravilnika o korištenju i o redu na javnim smučarskim terenima ("Službeni list Bosne i Hercegovine", br. 38/82 i 33/87),
- Pravilnika o službi prve medicinske pomoći na javnim smučarskim terenima ("Službeni list Bosne i Hercegovine", broj 20/82),

- Pravilnika o stručnoj spremi i drugim uvjetima za obavljanje stručnog rada u organizacijama za fizičku kulturu ("Službeni list Bosne i Hercegovine", broj 16/87),
- Pravilnika o stručnoj spremi, osposobljenosti i stručnom nadzoru u ostvarivanju aktivnosti u sportu i sportskoj rekreaciji ("Službeni list SRBiH", broj 1/92).

Član 84.

(Stupanje na snagu ovog Zakona)

Ovaj Zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-31421/12
27. decembra 2012. godine
Sarajevo

Predsjedavajuća
Skupštine Kantona Sarajevo
Prof. dr. **Mirjana Malić**, s. r.

Na osnovu člana 18. stav 1. tačka h) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01 i 28/04) i člana 21. stav 2. Zakona o budžetima - proračunima u Federaciji Bosne i Hercegovine ("Službene novine Federacije BiH", br. 19/06, 76/08, 5/09, 32/09, 31/09, 9/10, 36/10, 45/10 i 25/12), Skupština Kantona Sarajevo, na sjednici održanoj 27.12.2012. godine, donijela je

ODLUKU

**O PRIVREMENOM FINANSIRANJU POTREBA
KANTONA SARAJEVO ZA PERIOD OD 01.01. DO
31.03.2013. GODINE**

Član 1.

Privremeno finansiranje potreba Kantona Sarajevo, za koje se sredstva obezbjeđuju u Budžetu Kantona Sarajevo, za period 01.01. do 31.03.2013. godine vršit će se sredstvima najviše do 1/4 ukupnih prihoda utrošenih Budžetom za prethodnu fiskalnu godinu.

Član 2.

Ova odluka stupa na snagu danom objavljivanja u "Službenim novinama Kantona Sarajevo", a primjenjivat će se od 01. januara 2013. godine.

Broj 01-05-31423/12
27. decembra 2012. godine
Sarajevo

Predsjedavajuća
Skupštine Kantona Sarajevo
Prof. dr. **Mirjana Malić**, s. r.

Na osnovu člana 120. Poslovnika Skupštine Kantona Sarajevo ("Službene novine Kantona Sarajevo" - Drugi novi prečišćen tekst, broj 46/12), Skupština Kantona Sarajevo, na sjednici održanoj dana 27.12.2012. godine, povodom razmatranja Prijedloga odluke o privremenom finansiranju potreba Kantona Sarajevo za period 01.01. do 31.03.2013. godine, donijela je slijedeći

ZAKLJUČAK

Zadužuje se Ministarstvo finansija Kantona Sarajevo da sačini cjelovitu informaciju o stanju Budžeta Kantona Sarajevo na dan 21.11.2012. godine o stvorenim obavezama, detaljno po svim budžetskim korisnicima, te procjenom obaveza koje će nastati do kraja budžetske godine u skladu sa odlukom o privremenoj obustavi izvršavanja pojedinih rashoda.

Broj 01-05-31423/12
27. decembra 2012. godine
Sarajevo

Predsjedavajuća
Skupštine Kantona Sarajevo
Prof. dr. **Mirjana Malić**, s. r.

Na osnovu člana 38. stav (1) Ustava Kantona Sarajevo, Amandmana XXXII na Ustav Kantona Sarajevo, ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 31/04), čl. 46. Zakona o budžetima u FBiH ("Službene novine Federacije BiH", br. 19/06, 76/08, 5/09, 32/09, 9/10, 36/10, 45/10 i 25/12), Skupština Kantona Sarajevo, na 22. sjednici održanoj 27.12.2012. godine, donijela je